

bellir leurs raisons de discours salutaires, & polir leur rude barbarie de la politesse des bonnes mœurs, afin qu'ayant cognu qu'ils sont hommes, ils puissent
7 || deuenir Chrestiens, & participer avec vous de cette foy qui nous honore du riche tiltre d'enfans de Dieu, coheritiers avec nostre doux Iesus, de l'heritage qu'il nous a acquis au prix de son sang, où se trouuera cette immortalité veritable, que la vanité d'Appolonius après tant de voyages, n'auoit peu trouver en terre, où aussi elle n'a garde de se pouuoir trouuer.

Comme les Religieux ont partout esté les premiers employez à la conqueste des ames, & de la Mission des Peres Recolleçts en Canada.

CHAPITRE II.

La diuine prouidence a disposé ainsi des choses, que tous ceux qu'il a enuoyé à la conqueste des ames fides, ont esté Apostres ou gens Apostoliques. La doctrine & saincteté desquels il a pleu à Dieu de confirmer par miracles authentiques & irreprochables, & depuis l'an 600 à paine se trouuera il aucune conuersion de peuples infidelles, qui n'ait esté entreprise par des Religieux, faisans profession d'obeissance, pauureté & chasteté, & si vous prenez la peine de lire les historiens vous verrez qu'il n'y a coin où l'Euangile